

Jadid

adabiy, ilmiy-ma'rifiy va ijtimoiy haftalik gazeta

TARIXIY KUN

YANGI O'ZBEKISTONNING YANGI TOSHKENTI



Yaxshi niyat va orzularning ro'yobi kishi qalbini cheksiz quvontiradi. O'zbekiston ahli obodlik ko'ngillardan boshlanib, moddiyatga ko'chishdek yangilik va tarixiy hodisalarga yaqin o'tgan bir necha yil davomida guvoh bo'lib turibdi.

Yana bir muhim yangilik. Kechagi kun — 2024-yil 3-aprel Yangi O'zbekiston tarixiga zarhal harflar bilan bitiladigan quvonchli kundir.

Unutilmas bu kunda Respublika Prezidenti qadim Shoshga tutash hududda Yangi Toshkent shahri yuragi, ma'naviy gulto'ji bo'lajak ilmu irfon maskanlari, madaniy inshootlar tamal toshini qo'yd.


Respublika Prezidenti uch yil avval so'zlagan nutqida "Biz sekin-asta "Yangi Toshkent"ni quramiz", degan fikrni aytgani ko'pchilikning yodida bo'lsa kerak.

Zero, niyat va rejaning amalga oshishi, bu millionlab mamlakat ahli oldida aytilgan so'zning ijrosi demakdir. Bunday bunyodkorlik uchun mo'ysafid otaxonlar, tabarruk onaxonlar shunday Ro'zai Ramazon kunlari, albatta, xayrli duolar qiladi.

(Davomi 2-sahifada.)

Jahon tarixining mangu chinorlaridan biri Amir Temurni boshqa ulug' siymolardan ajratib turadigan, insoniyatni hayratga soladigan fazilatlar juda ko'p. Ana shulardan biri, shubhasiz, uning bunyodkorlikka bo'lgan mehri va shijoatidir, muxtasar aytganda, uning tom ma'nodagi bunyodkorligidir. Rus sharqshunos olimi V.V.Bartold uning g'ayratiga qoyil qolib: "Revnostny stroitel" (jonkuyar va ashaddiy bunyodkor), deb ta'riflagan edi.

SOHIBQIRON AMIR TEMUR TAVALLUDINING 638 YILLIGI



"HAR YERDAKIM, IMORATQA QOBIL YER KO'RSA ERDI.."

Betimsol bobomiz Amir Temur har ishga kirisha, qattiq kirishar edi. Sharafuddin Ali Yazdiy ham: "Hazrat Sohibqironning biyik himmati — har ishning oxirigacha yetkurmaguncha o'turmas erdi", deya bejiz yozmagan edi.

Bir qiziq va ibratli voqea: hali oddiy amirlardan biri maqomida, qaysar, o'zboshimcha va izzattalab amirlar boshini goh qovushtirishga erishib, goh qovushtira olmay Turkiston cho'llarida ot choptirib yurgan pallalarda-yoq — 1365-66-yillar qishida Sohibqiron Qarshi qal'asi qo'rg'onini qurishga kirishdi va poyoniga yetkazdi. Temurbek bu paytda yigirma to'qqiz yoshda edi. Uning bu harakatlari katta maqsad yo'lida zinhor ikkilanib o'tirmaganini, yosh amir o'shandayoq ko'ngliga ulug' umidlar joylaganini, uzoq maqsadlarni ko'zlaganini, garchi o'sha payt oddiy bir amir bo'lgan esa-da, o'zini butun mamlakat uchun mas'ul sezganini ko'rsatadi. Chunki uning kelajakka ishonchi yuksak va sobit edi.

Ma'lumki, Samarqand ham mustahkam devorlar bilan o'ralmagan edi. Shahar saltanat markazi qilib belgilangandan keyin, Amir Temur unga poytaxt ko'r-k-u salobatini berish, obod maskanga aylantirish yo'lida katta harakat boshladi. Bu harakat Sohibqironning butun umri davomida bir lahza tingani yo'q, desak mubolag'a bo'lmas. Dastavval ko'chalar orasta qilindi, Ko'ksaroy bunyod etildi. "Samarqand arkida Temurbek ulug' bir ko'shk solibdur, to'rt oshyonliq, — deb yozadi Bobur Mirzo "Boburnoma" asarida. — Ko'ksaroyga mavsum va mashhur va oliy imoratdur".

Amir Temur saltanat boshiga kelganiga bir yil bo'lganda, milodiy 1371-yilda olti darvoza tiklandi, shaharsozlik rivojlanib ketdi, shahar mustahkam qal'a devorlari bilan o'rab olindi. Sohibqiron Samarqandni dunyoning eng oldi shahariga aylantirmoqchi edi, bunga erishdi ham.

(Davomi 4-sahifada.)

QADRIYAT

Insonlar borki, nasabi shariflari zikr etilganda vaqt to'xtaydi go'yo. Ular asrlardan asrlarga o'tib yashayveradilar. Xuddi Xizr alayhissalomning mangu tirikligi haqidagi afsonalar kabi... Xalq esa ular bosgan tuproqni-da e'zozlaydi, tabarruk qadamjolariga aylantiradi, ehtiram ila u joylarni ziyorat qiladi.

NASAFIYNING BOQIY NAFASI

Qarshidan o'n yetti kilometr uzoqlikdagi Qovchin qishlog'ida Abul Muin Nasafiy ziyoratgohi bor. 1027-1114-yillarda yashab o'tgan Abul Muin Nasafiy ulug' islom olimi imom Moturidiyning izdoshi o'laroq, uning aqidalariga ters oqimlarga qarshi o'zining asosli ilmiy mulohazalari bilan kurasha olgan kalam ilmining yetuklaridan biridir. Ziyoratgoh ana shunday ilm-u irfon jonkuyari sharafiga nomlangan. Xalqimiz asrlar davomida e'zozlab kelgan ushbu muqaddas qadamjo ham sobiq tuzum davrida o'g'itxonaga aylantirilib, oyoqosti qilindi.

(Davomi 2-sahifada.)

KREATIV IQTISODIYOT:

ISTIQBOL VA MUAMMOLAR



— Hurmatli Nurisлом aka, baringiz bor, Respublika Ma'naviyat va ma'rifat kengashining 22-dekabr kuni bo'lib o'tgan kengaytirilgan yig'ilishida davlatimiz rahbari tomonidan xalqimizning birdamligi, erkinligi va farovonligini ta'minlashga qaratilgan qator ezgu tashabbuslar ilgari surildi. Jumladan, joriy yilda Toshkentda jahon kreativ iqtisodiyotiga bag'ishlangan xalqaro konferensiya o'tkazish nazarda tutilgan. Kreativ iqtisodiyot nisbatan yangi yo'nalish bo'lib, uning mazmun-mohiyati keng jamoatchilikka hali u qadar tushunarli emas. Shunga ko'ra, dastavval o'quvchilarmizni kreativ iqtisodiyotning "tarjimai holi" dan boxabar qilsangiz.

— "So'zdan so'zning farqi bor, o'ttiz ikki narxi bor", deydi dono xalqimiz. Darhaqiqat, avvalboshda bu tushunchaning ma'no-mazmunini anglab olganimiz ma'qul. Kreativ (kreativlik) lotincha "creatio" so'zidan olingan bo'lib, ijod, ijod qilish ma'nosini anglatadi. Kengroq ma'noda u kishining standart g'oyalari, an'anaviy qoida-yu qoliqlardan chiqish qobiliyatini bildiradi. Sirasi, u ilg'or fikr va yondashuvni, originallikni taqozo qiladi. Iqtisodiy ravnaq uchun kreativ fikrlashning o'ziga kifoya emas. Undan yaratuvchi ham, iste'molchi ham birdek manfaatdor bo'lishi, naf ko'rishi kerak bo'ladi. Buning uchun esa har qanday kreativ g'oya moddiylashuvi, tovar va xizmatga aylanishi kerak. Keyingi

bosqich tijoriylashuvdir. Kreativ tovar va xizmatlar bozor obyekti sifatida yetilishi, ta'bir joiz bo'lsa, tarozidan o'tishi, iste'molchi ehtiyojini qondirishi lozim. Shundan keyingina u iqtisodiy o'sish omiliga aylanadi.

Shu ma'noda kreativ va innovatsion iqtisodiyot bir-biriga o'xshab ketadi. Ammo ular o'rtasida anchagina farqlar ham mavjud. Kreativ iqtisodiyot intellektual, madaniy tovar hamda xizmatlarni yaratish, rivojlantirish va tijoratlashirishga qaratilgan. Binobarin, san'at, madaniyat, kino, dizayn, media, moda, ma'naviy meros, urf-odat, an'analar va boshqalar uning asosiy unsurlari hisoblanadi. Innovatsion iqtisodiyot esa ishlab chiqarish, texnika, texnologiyalar va biz-



Nurisлом TO'XLIYEV,
O'zbekiston xalqaro islom akademiyasi professori,
iqtisodiyot fanlari doktori,
akademik

nesga yangiliklar kiritishning barcha jabhalarini qamrab oladi. Bu jarayonda mutlaqo yangi mahsulotlar ishlab chiqariladi, xizmatlar yaratiladi. Kreativ iqtisodiyotda ishlab chiqarish va xizmatlar ko'rsatish sohasiga ijodiy yondashuv orqali madaniy va intellektual aktivlardan foydalaniladi.

(Davomi 3-sahifada.)

TADQIQOT

HUSAYN BOYQARO "ZAFARNOMA" SI

Ilmda Sharafuddin Ali Yazdiy tomonidan yozilgan "Zafarnoma"ning nodir qo'lyozma nusxasi "Husayn Boyqaro "Zafarnoma"si, deb ataladi. Hozirda bu qo'lyozma Amerika Qo'shma Shtatlarida saqlanadi. 2022-yil mazkur qo'lyozmani ko'rish ishtiyogida biz bu mamlakatning Baltimor shahriga yo'l oldik. Natijada, ayni qo'lyozmaning asl nusxasi bilan tanishishga muvaffaq bo'ldik.



Sharafuddin Ali Yazdiy (1454-yili vafot etgan) tomonidan 1419-1425-yillarda yozilgan "Zafarnoma" asari Amir Temur va temuriylar tarixi bo'yicha yaratilgan eng mashhur asarlardan hisoblanadi. Uni Sharafuddin Ali Yazdiy temuriy shahzoda Ibrohim Sulton buyurtmasiga ko'ra Sheroz shahrida yozgan. Amir Temurdan keyin va Hirotning 1507-yili Shayboniylar tomonidan bosib olinishi orolig'ida Yazdiy "Zafarnoma"sining miniatyuralarga ega uch qo'lyozma nusxasi ko'chirilgan ma'lum. "Zafarnoma"ning ko'plab qo'lyozma nusxalari dunyoning turli kutubxonalarida saqlanadi, nodir nusxalari ko'p emas. Shulardan biri "Husayn Boyqaro "Zafarnoma"si"dir. Mazkur nomlanish "Zafarnoma"ning noyob va yozilganidan ko'p vaqt o'tmay ko'chirilgan nusxalaridan biri temuriy hukmdor Husayn Boyqaroga tegishli bo'lganidan kelib chiqqan. Qo'lyozma asar 1467-1468-yili ko'chirilgan. Qo'lyozmaning boshida Husayn Boyqaro madh etilgani uchun ayni qo'lyozma "Husayn Boyqaro Zafarnoma"si" nomi bilan mashhur bo'lgan.

(Davomi 4-sahifada.)

